

Regio & unde
dicta.

Sinu.

Aeris qualitas.
Soli fertilitas.

PROVINCIA hæc Syriæ longe celeberrima, olim *Terra Chanaan*, dicta fuit, a *Chanaan*, filio Cham, qui communis discessionis necessitate pulsus eam tenuit: *Terra* item *Promissa* live *Promissionis*, quod Patribus Abraham, Isaac & Jacob a Deo promissa esset. Hæc ipsa veteribus Incolis ex ea pulsis, atque Israelitis in eorum locum substitutis, *Israel* & *Judea* cœpit appellari. Ptolemæus & alij *Palestinam* nuncupant, a *Palestinis* populis magni nominis qui in Sacris literis *Philistin* vocantur: Christiani *Terram Sanctam*. Regio hæc in umbilico Orbis constituta, inter Mare Mediterraneum & Arabiam, qua ex parte Montibus fere continuis natura ultra Iordanem fluvium vallatur: atque ab Ægypto incipiens, ut vult Herodorus, vel ut alij, a Sitbonis lacu, usque ad Phœniciam porrigitur. Ab Oriente autem Syriam & Arabiam: a Meridie desertum Pharan & Ægyptum: ab Occidente mare Magnum seu Mediterraneum: a Septentrione vero Libanum montem, fines habet. Ejus longitudo ad Septentrionem a Civitate Dan ad radicem Montis Libani sita (quæ postea Cæsarea Philippi & Paneas dicta est) versus Meridiem porrigitur, & usque ad Bersabach Civitatem in Tribu Simeonis contra desertum magnum sitam, plus minus LXVII conficit milliaria, singula unius horæ itinere commensuranda. Latitudo vero, quæ ab Occidente a Mari magno in Orientem ad Iordanem usque sumenda, quibusdam locis XVI, quibusdam XVII milliaria complectitur. Inter omnes vero Regiones quæ sub Cælo sunt ob Aeris salubritatem Cælique temperiem imprimis commendatur, in qua nec rigor est nimius hyemis, neque æstatis ardor. Imprimis autem ob Solis ubertatem, Frugum omnis generis abundantiam, atque aliarum omnium rerum copiam, quæ res tum ad hominum vitam sunt necessaria, tum etiam earum quæ hominibus solent esse in delitijs, apud Scriptores tam sacros quam prophanos, maximis est celebrata laudibus. Moses de hac ita Israelitis est varicinatus, Deutero. VII. *Ecce Dominus Deus tuus introducet te in regionem bonam & amplam, cuius aquæ, torrentes, & fontes abyssi exeunt ex planiciebus & montibus. terram Tritico & Hordeo abundantem, Vitibus, Ficibus, Malis Punicis, Palmis: terram Oleo & Melle affluentem, in qua pane tuo absque penuria vescaris: terram cui pro lapidibus est Ferrum, & cujus ex Montibus Æs effodias: terram Lacte & Melle manantem: terram quam Deus tuus procurat, cui divinitus prosperitas est collata, ut fertilitate omnes alias terras superet, ac Paradisi Dei sit adsimilis.* Longum foret reliquorum, Iosephi, Plinij encomia quibus miram hujus terræ commendant fertilitatem commemorare. Videndus de his oculatus testis Brocardus. Ex his vero quæ ad vitæ delicias, vel Medicinæ usum faciunt, præcipue commendatur *Balsamum*, huic olim Orbis parti generosissimum uni a Deo concessum, quo nunc caret. *Aromata*, *Masticæ*, ac duo *Nucum* genera, alterum *Amygdala* Latinis dictum: alterum vero quod optimum in ea regione est, Græcis & Latinis *Pistacea* dictum. In Montibus etiam Ferrum atque Aeris Metalla effodiuntur.

Aquis